

а у безумных в дому всегда пир. Лутчи слушати прения мудрых, нежели наказания безумных. Дай бо премудру вину, премудрее будет.

31. Не сеют бо на браздах жита, ни мудрости на сердце безумных. Безумных бо ни сеют, ни орют, ни в житницы собирают, но сами родятся. Како во утле межу жито нести, так и безумнаго учити (л. 260); псом бо и свиниям злато и сребро ни во что же, ни безумному мудрость и драгие словеса; ни мертвеца разместити, ни безумнаго наказати. Коли пожрет саница орла когда какамение [так!] по воде сплывает, коли свиния учнет белку брехати, тогда безумный уму научится.

32. Или ми речеши: от безумия есть молвил. То не ведал есть небо поломянно или звезд¹ «лутовяных», ни безумнаго премудро глаголюща (л. 260 об.). Или ми речеши: солгал ми еси аки пес. Добра бо пса князи и вельможи любят. Или ми речеши: солгал ми еси, аки тать. Аще есть красти умел, только бы тебе не оскорбил. Девица бо красоту свою погуби бляднею, а муж свое мужество татьбою.

33. Господине мой! Не море топит корабли, но ветри: не огнь творит разжение железу, но надымание мешечное; так же и князь «не сам» впадает в вещь, но думчие его вводят. З добрым и непоколебимым думцым думает (л. 261) князь, высока стола добудет.

34. Глаголет бо в мирских притчах: ни в скотех скот коза; ни в зверех зверь еж; ни во птицах птица нетопырь; ни в рыбах рыба рак; ни в мужех муж, которым жена владеет; ни в женах жена, иже от своего мужа блядет; ни в работах работа, иже под женами в повозницах; ни в слугах слуга, иже чернице работает.

35. Дивное хитро, иже кто поймет жену злообразну прибытка ради.

36. Видех жену (л. 261 об.) злообразну, приничющу в зерцало и мажущуся румянѣдом, и рех ей: не зри в зерцало, видевше нелепость лица своего, зане большую печаль приемлет.

37. Или ми речеши: женися у богата тестя великия ради чести; тамо яждь и пей. То лутче ми велбуды в дом свой «вести», нежели зла жена учити; вол бо не молвит, ни зла мыслит; а зла жена биема бесится, кротима высится, в богатстве гордость приимает, а в убоже- (л. 262) стве всех осушает.

38. Что есть зла жена? Гостинница умывания, купчина бесовская. Что есть зла жена? Мирский мятеж, ослепление ума, начальница всякой злобе, во церкви бесовская мытница, поборница греху, застава от спасения.

¹ В рукописи после слова „звезд“ оставлено чистое место на одно слово.